

MEHĪ TIAKU MINĀPIN

¹ Uito Iesui ywyt sese Tiaku. Iesui ti uheyke'et sese are. Pyno meĩũ uito Tiaku uimiwan atipo'oro ehowawi. Uito ti Tiaku Tupana eropat hat i'ewyte Aika'iwat Aipotypot Iesui eropat hat uito are. Koitywy atipo'oro ui'e hap torania kape Tupana mēpyt'in aimēpuo aimēpuo yi wato hap ok tā tukup-te'en hap kape. ² Uiwyrria'in karāpe put'ok'e ahete aikotā aikotā mikyry'i hap ho'opot hap ahā'āg hap mi'i pote waku watuwehum kahato Tupana kape. ³ Mi'i hap watunug mote po'og ihāite ahepiat imohey hap. Mi'i hawyi wahaty sepap ne'i ra'yn karāpe wētup ok kaipyi ra'yn ahā'āg hap put'ok'e turan. ⁴ Waku yt watuwemig i ahā'āg hap pupi. — Waku arakosap aru ho'opot hap sakpo wato'e yn waku yn aipy'a pe. Mi'i hap watunug mot'i pote Iesui mohey haria wo kahato watoĩne'en hāpyk sese rakat hap ete. Wahupit kuap waho'opot hap ahā'āg hap pote ti hekat kahato rakaria ewy watoĩne'en Tupana wanētup hawe.

⁵ Karāpe yt watikuap i kat som waku watunug hāpyk takat ahā'āg hap put'ok'e turan mi'i hap e'at pe waku wahētup kahato wuat'i kuap sese hat Tupana kape. Mi'i hawyi aikotā waku hamuat tohenoi kahato ahepe towese popuo aimu'e yt ahaty'i haty'i popuo hin i aināpin Tupana. ⁶ Imohey kahato hap wywo yn waku wahētup aimowe'eg hamuat wahētup Tupana pe. Yt naku i wahētup Tupana pe imohey ran hap wywo. Ma'ato karāpe wahētup imohey ran hap

wywo ne'i pote ahehay yt aiwesat i wyti aru imohey ran nywo ne'i wahētup wote. Yt naku i imohey hap kowo'i kowo'i aiwanētup hap mywo wahētup. Ma'ato mi'i hap wywo wahētup pote watopyhu'at aikotā y'y hyemueri piat ewy ne'i aiwanētup hap. Aikowo aikowo wasere wato upi hap ewywuat watoīne'en aiwanētup hawe imohey hap upi. Yt naku i are. ⁷ Aikowo aikowo ne'i imohey hap aiwanētup hawe pote yt naku i kahato watopyhu'at katupono atimohey kahato Tupana wato'e irania'in me ma'ato yt pywo pe i katupono typy ihay rakat ewy watoīne'en aiwanētup hawe. ⁸ Karāpe wahētup Tupana kaipyi aimiky'esat ko'i ma'ato yt watomohey kahato i hap wywo pote typy ehay rakat ewy watoīne'en. Yt naku i wato'e Tupana pe — Woromohey En Tupana wen ma'ato yt atikuap i sio etum aru uimiētup sio yt wato'e pote kowo'i kowo'i watomohey typy wanētup haria watopyhu'at. Mi'i hap ewy wahētup pote aimiētup yt heremo hin i Tupana wanētup hawe. Mi'i pote yt tutum kuap i aimiētup Tupana tuwekaipyi.

⁹ Karāpe watomohey Iesui hawyi ho'opot kahato hap topyhu'at ahete katupono irania'in yt imohey i haria yt i'atuwese hin i ahete — Yt naku i kahato eipe i'atu'e ahepe. Mi'i hawyi ahehaky'e'i kahato hap toīne'en ahete. Mi'i pote yt naku i aiwanētup hap yi kape are. Yt naku i watuwemōti imohey hap ete katupono Tupana wanētup hawe waku pe watoīne'en. ¹⁰ Hekat rakaria miit'in mimōtypot ko'i tukupte'en mesuwarote i'atu'e ma'ato Tupana wanētup hawe imohey haria hekat rakaria ewy tukupte'en katupono yne Tupana wanuat toīne'en imohey haria po pe. Mi'i tupono waku hekat

rakaria mesuwarote aito pote waku watuwehum Tupana kape are ma'ato yt naku i watuwehum ahekat ete — Uito po'og uhekat wato'e aiwanētup hawe. Waku paa'e haria wo watopyhu'at ahekare'en ko'i ete katupono iku'uro irane mi'iria hekat rakaria pytkai. Mi'i hawyi aiku'uro hawyi yt kat i ahekat mesuwarote. Ta'i aheñne'en hap mesuwarote ipohyt ko'i ewy kahato. At hakup kahato hawyi igag ipohyt hawyi iteneg na'yn hawyi iku'uro. ¹¹ Pywo ipohyt ewy kahato hekat rakaria tukupte'en. Mesup hekat kahato rakaria tukupte'en mi'i hawyi mūki'ite satek hap e'at pe hawyi ihaky'e'i kahato rakaria wo tukupte'en ipohyt teneg ewy. Karāpe Tupana ainug hekat rakano mi'i pote waku watuwehum kahato ahekat nug hat Tupana ete. I'ewyte karāpe yt ahekare'en kahato i hap put'ok'e ahete waku watuwehum kahato wy Aimowepit hat Tupana ete are katupono watikuap yt ahekat kaipyi i aimowepit sese hap tut. Waku wato'e — Ta'i ahekat mesuwarotiat ipohyt ewy waku wato'e mesup. Ikahu kahato tig wen ma'ato mūki'ite toto ra'yn. Mi'i hap ewy ahekat yt toñne'en mot'i hin i waku wato'e ahatek hap e'at pe mesuwe.

¹² Ma'ato uwe uwe tepiat ho'opot turan te haky'e'i turan yt iwaure i imohey hap mi'i hat ti Tupana mimowaku wo toñne'en i'ewyte Tupana mimowepit kahato wo topyhu'at wuat'i e'at pe katupono ho'opot hap sakpo gosap hat toñne'en imohey hat. Mi'i hat pe Tupana to'e aru — Uiky'e hat sese en e. Mi'i pote woromoieñne'en kahato wuat'i e'at pe e yt tewaure i haria pe. ¹³ Karāpe ahã'ãg hap toñne'en ahete yt naku i nug hamuat

mi'i pote yt naku i wato'e aipy'a pe — Tupana ti uhã'ãg kahato yt naku i nug hamo yt naku i wato'e katupono Tupana yt ahã'ãg kuap i sa'ag nug hamo i. I'ewyte yt wahã'ãg kuap i Tupana sa'ag nug hap ete aito. ¹⁴ Aiwanētup hap miky'esat sa'ag kaipyi ti tuwētem ahã'ãg sa'ag nug hamuat hap. Aimiky'esat sa'ag aipy'a piat aima'at hamuat topyhu'at aikotã ewamiri miat hã'ãg hap ewy. Aimiky'esat ahã'ãg kahato yt naku i nug hamuat. Wahã'ãg hawyi watopyhu'at aima'at hawe aikotã hapiri topyhu'at ewamiri pe hap ewywuwat. ¹⁵ Aimiky'esat sa'ag ko'i ahepiat i'aparap hap toĩne'en. Aiwanētup sa'ag hap aikotã aikotã waku watunug aru aiminug sa'ag ainug yt naku i nug haria sese katupono meremo watuwat aiwanētup sa'ag hap ko'i upi. Watunug aimiky'esat sa'ag ko'i hawyi sa'ag nug haria wo ra'yn watopyhu'at Tupana wanētup hawe. Mi'i hawyi Tupana ui'apiheg hap yn topyhu'at aiwanētup hawe. ¹⁶ Yt naku i watuwema'at uiwyria'in are. Yt naku i watunug aimiky'esat sa'ag. Waku watoiat aimiky'esat ko'i yt naku i nug neran hap ko'i.

¹⁷ Tupana ti hētyhot kahato rakat ewy toĩne'en. Tupana ti at nug hat waty nug hat i'ewyte wuat'i waikiru nug hat wyti Mi'i. Tupana yne wakuap nug hat. Yt kat hin i sa'ag Tupana tunug. Yne imienoi ko'i hāpyk yn na'yn. Ewaty at yt hētyhot mot'i i ahowawi. Hētyhot rokirē yt ra'yn tuereto at waty waikiru ko'i wen ma'ato Tupana sese yt mi'iria tominug ko'i yt ewywuwat hin i toĩne'en. Tupana ti po'og po'og aipowyro hat tominug at waty waikiru ko'i kai. Mi'i ti po'og po'og ipotpap at ka'ap wyti aipoityro hamuat. Yt kat sa'up i watum

pytkai tutum yne yne ahepe tekak ko'i aimowepit hamuat ko'i. Hētyhot at ka'ap Tupana. ¹⁸ Tehay pywuat sese wo ainug tomēpyt'in ko'i. Mi'i hawyi aito watopyhu'at Tupana mowepit kahato haria aikotā aimikoi pakup haat rakat aimowepit hap topyhu'at. Mi'i hap ewy aito Iesui mohey haria watopyhu'at Tupana mowepit hanuaria wo sese katupono — Po'og po'og uimiky'eria eipe torania uiminug ko'i kai e Tupana ahepe tosa'yru'in me tosaki'yt'in me.

¹⁹ Uiwyrria'in waku wyti watuwewaure ka'a kahato aimu'e haria mienoi kape. Waku watuwanētup kahato hawyi waku aiwe'eg ahehay. Yt naku i iūte'en hap wywo. Yt naku i aipy'ahak hap wywo ne'i watiwesat aiwy are. Yt etiwaure tei'o mi'i hap nug hamuat. Uiwyrria'in waku ehewaure ka'a kahato aimu'e haria ehay kape. Waku watuwanētup kahato. Waku aiwe'eg hap wywo ahehay yt kat i iūte'en hap wywo. Yt naku i aipy'ahak hap wywo watiwesat iūte'en. Yt etiwaure tei'o mi'i hap nug hamuat. Uiwyrria'in waku ehewaure ka'a kahato aimu'e haria ehay kape. Waku watuwanētup — Uimu'e o uiwy e hap yn aiwanētup hawe waku wato'e. ²⁰ Tupana tiky'esat kahato wyti hāpyk takat yn mi'i tupono ti aiwo'opy'ahak hap kaipyi ne'i yt watunug kuap i Tupana miky'esat ewywuak ko'i. ²¹ Waku ti watoiat yne yne aiminug yt naku i hap ko'i i'ewyte yne aheko sa'ag nug hap ko'i. Mi'i hawyi ti waku watuwewaure ka'a kahato Tupana ehay kape paa'ai'e hap wywo yn katupono Tupana yn ahehakyera'at kuap tehay wo. Mi'i pote — Uimu'e kahato ro ehay nug hamo waku wato'e Tupana pe. Tupana etikoi kahato

o ehay uiwanētip hawe waku wato'e. Yt naku i aheko sa'awy'iwuat ewywuat ahewaure waire nug hap. ²² Yt naku i ti ahewaure ka'a wo yn watuwewanētip Tupana ehay kape. Ahewaure pe yn Tupana ehay toīne'en mote ti aiwema'at hap yn toīne'en katupono ihay watunug hap kaipyi Tupana miky'esat wy. Toiky'esat kahato aheko towat ewy hap toiky'esat. Toiky'esat tehay hētyt rakat ewy hap aimikoi ewy hap toiky'esat. Tomiky'esat nug hepiat hap wyti toiky'esat. ²³ Y'y kape wateha'at aipā'āu kape watuwepiok kahato aipā'āu kape. Aikotā aipiit aikotā aipainug hap aikotā aikahu hap wateha'at aipā'āu y'y piat kape. Ma'ato wateha'at kahu hawyi wato i ra'yn hawyi meremo watiwaure ra'yn aikotā ahowapy aikotā hap. ²⁴ Mi'i hap ewy ti Tupana ehay watikuap sa'ag hawyi wato hawyi watiwaure ra'yn watikuap sa'awy'i rokirē wuat pytkai. ²⁵ Ma'ato ahewaure ka'a kahato Tupana ehay kape — Atikuap teran kahato ehay wato'e Tupana pe hawyi watuwe-waure ka'a kahato Tupana piat aināpin hāpyk takat kapiat hawyi watuwemu'e kahato hawyi watikuap kahato inug hamuat hap. Watunug Tupana miky'esat ewy hawyi Tupana aimowepit kahato aiminug upi katupono watunug i'e hap ewy kahato hawyi aipoityro kahato yne aiminug ete.

²⁶ Karāpe yt wāiwato'e i ahehay sa'ag hap miit'in ete mi'i pote yt kan hamo i — Tupana mohey kahato hat uito wato'e katupono wema'at haria wo i watoīne'en. Yt kan hamo i ahehay miit'in mu'e hap ete katupono ta'atukuap typy ihay rakaria aito hawyi ahehay Tupana ete ihay se wen ma'ato

aheday irania'in ete yt naku i katupono sehay i'ewyte sa'ag tuwētem aiwē pyi wy. ²⁷ Uwe uwe yt ity i yt i'ywot i rakat powyro hap kaipyi Ai'ywot atipy piat Tupana tikuap kahato tomohey hat sese pywo sio yt hap. Uwe uwe hiwuria powyro hap ko'i toikuap aito tomohey hat sese pywo sio yt hap e. Uwe uwe hatek takaria powyro hap ko'i toikuap tomohey hat sese pywo sio yt hap e. Karāpe irania'in ahā'āg yt naku i nug hamo ma'ato yt watuwat i i'atu'e hap upi — Uito Iesui mohey hat pote yt atunug neran i te wato'e. Mio tā wato'e hawyi Ai'ywot atipy piat tikuap kahato aito tomohey sese haria wo ra'yn aikuap are uito Tiaku.

2

¹ Uiwyrria'in Apotypot Koro Iesui ti wuat'i mimōtypot nuat topyhu'at. Mi'i tupono ti waku wati'atumōtypot irania'in. Yt naku i uimi'airoria yn i miit'in wati'atuky'e. Ma'ato Aika'iwat ti'atuky'e yne miit'in torania hap ewy waku wati'atuky'e yne. Yt naku i wati'airo aiwyrria'in i'atuekat hap upi i'atuwepainug hap upi ne'i are. Yt naku i wati'atuky'e ai'ywania ko'i yn. ² Karāpe aiwo'omu'e hawe tut wētup ok miit hekat rakat wuat'i iwat toī tuwepainug hesokpe ikahu ipu'iāpiat imehit. I'ewyte tut wy wētup ok yt hekat i rakat hesokpe sa'ag wywo tut. ³ Mi'i hawyi wato'e hekat rakat pe — Uiwyr kahato en. Waku era'apyk mesuwe e'amyap ikahu rakat rote ma'ato mi'i hawyi yt hekat i rakat pe — Pyno waku en itote y'am me ro ereīne'en sio yi tote ro era'apyk wato'e hap kaipyi Ai'ywot Tupana aikuap. ⁴ Uiwyrria'in yt

naku i watimohit hatek takaria yt hekat i rakaria. Ma'ato watimohit miit'in yt hekat rakaria i yt uwe wat i mimōtypot ko'i yt hekat i rakaria pote meremo Tupana tikuap aiminug yt naku i hap. Tupana ti'atuky'e yne aito sio aipiit ikahu sio yt. Sio ahesokpe ikahu sio yt kat i ahesokpe toi'atuky'e torania aitoria topy'a pe. Waku Tupana ewy wati'atuky'e torania miit'in sio hekat rakat sio yt. Waku wati'atuky'e irania'in Tupana aiky'e hap ewy. Miit'in ekat ky'ewi hap ne'i wati'airo aiwyria'in mote — Uito po'og e hat ewy watoñe'en Tupana wanētup hawe katupono watiky'e miit'in i'atukat ky'ewi hap wywo ne'i. Wētup ky'e hamo yn waku wati'atuky'e miit'in sio morekuaria sio miit emiit ko'i. ⁵ Pyno ewetum no ehewaure ka'a uhepe uimiky'e ko'i. Yt eweikuap i te apo aikotā Tupana ti'airo kahato yt hekat i rakaria Iesui mohey kahato hanuaria wo hap. Po'og toi'airo ihaky'e'i rakaria temiit no tetama pianuaria wo irania'in kai katupono sa'awy'i to'e — Uhemiiit sese wyti aru tukupte'en miit emiit haria wo karāpe arepyhu'at Wuat'i Miit'in Morekuat Koro mesuwarote e Tupana miwan me sa'awy'i. Mio tā to'e hap ewy ra'yn ti mesup te toi'airo temiit'in no miit yt uwe mikuap ewywuwat ko'i i yt uwe miky'e ewywuwat ko'i i e. Mi'iria pe ti — Woroho'o'airo eipe miit'in porekuaria wo uimohey sese haria eiperia pote e. Woroho'onug eipe morekuat no yne mesuwat yi tote e hatek takaria pe toky'e sese haria pe. Woroho'omoesaika uimohey kahato hap wywo wuat'i nug hamo e Tupana tomohey haria pe. ⁶ Eiperia yt hekat i rakaria pote hekat rakaria eimohit reran ne'i. Yt naku i ta'atunug

hekat rakaria. Ta'atu'atuky'esat wyti eiweteweru ta'atuepiat hap yn ta'atuky'esat. Mi'i hawyi yt eweha'up nug i ra'yn eiweteweru hap hawyi ti ehereto ra'yn surara'in kape ei'apiheg hamo. Yt ewenug nei'o mi'iria ewy ne'i are. ⁷ Aipotypot Iesui set mohit kahato haria wyti hekat rakaria. Yt i'atuwe'eg hin i mi'iria katupono Tupana ahēt'ok Iesui set upi. Yt kat set i po'og Iesui set kai ikahu rakat ahepe. Iesui ti Aika'iwat koro ma'ato yt ta'atumōtypot hin i Aika'iwat.

⁸ Sa'awy'i Aipotypot Iesui aimu'e tehay pywuat sese wo. Mio tā e — Waku wati'atuky'e kahato irania'in aiweky'e kahato hap ewy e ahepe aināpin hap sese. ⁹ Pyno waku watunug Aika'iwat koro aināpin hap ewy yn waku watunug. Waku wati'atuky'e torania miit'in aiweky'e hap ewy. Ma'ato waho'oky'e miit'in hekat hap upi ikahu hap upi mi'i pote Aimu'e hat aināpin hat ehay pun haria wo watopyhu'at. Mi'i hawyi yt nakuaria i wo watopyhu'at Tupana wanētup hawe. Waku wati'atuky'e torania miit'in watuweky'e kahato hap ewy e ahepe.

¹⁰ Tupana tiky'esat kahato watunug wuat'i tepiat aināpin hap ma'ato wati'aparap wētup aināpin hap mi'i hawyi yt naku i nug haria wo ra'yn watoīne'en. Wētup yn aimi'aparap hawyi yt naku i watopyhu'at Tupana wanētup hawe katupono wētup aināpin hap pe toīne'en yne Tupana piat aināpin hap wētup sehay pe — Aikotā ewei'atuky'e irania'in eiweky'e hap ewy e hap. Mi'i hap yt watunug i mote wati'aparap yne Tupana piat aināpin hap ko'i. ¹¹ Katupono sa'awy'ite Tupana aināpin miwan me — Yt

eweipohari tei'o wētup ok ihary'i ete he'aito ete e. I'ewyte to'e — Yt ewei'auka tei'o miit e tomiwan nu kawiat puretig etiat. Mi'i hawyi yt watipohari i wētup ok ihary'i ete he'aito ete ma'ato wati'auka wētup ok hawyi Tupana wo'onāpin hap wati'aparap kahato katupono miit auka hano ra'yn watopyhu'at ra'yn.

¹² Ma'ato ahowawi Tupana iha'at kahato sio watunug imiky'esat ewy sio yt hap kape yn. Tupana iha'at ahowawi sio wati'atuky'e irania'in aiweky'e hap ewy. Mi'i tupono waku wati'atuky'e miit'in Iesui ewy. Waku aiwe'eg wo aiminug ko'i kai ahehay ko'i kai sio miit'in ky'e hap toīne'en aikai Iesui miky'esat ewy sio yt Iesui miky'esat ewy i watunug hap ko'i. ¹³ Tupana piat miit'in apiheg hap e'at put'ok'e ra'yn turan mi'i hap e'at pe wyti yt kat i ra'yn Tupana kai i'atuehaky'e'i hap meimuē waria miit'in yt ehaky'e'i kuap i haria ete. Ma'ato irania'in wo'ohaky'e'i kuap haria kape yt kat i hin i aru i'atu'apiheg hap topyhu'at katupono Tupana tuwehum wo'ohaky'e'i kuap haria ete.

¹⁴ Pyno uiwyrria'in yt naku i ti ahehay wo yn watomohey Iesui katupono yt watomoherep i ahepiat imohey hap miit'in me aiminug wakuap ko'i mi'i pote ti yt kat hamo i ahehay se — Uito atimohey kahato Tupana wato'e. Uito ti Iesui mohey hat sese ai'e hap toīne'en aikai hawyi yt kat i aiminug wakuap ko'i miit'in ky'e hap moherep hamuat aikai mi'i pote ti yt kat i Iesui mohey hap sese toīne'en aipy'a pe ma'ato heso rakaria wo watoīne'en irania'in wanētup hawe i'ewyte Tupana wanētup hawe. ¹⁵ Karāpe put'ok'e ai'yat pe hatek takat Iesui mohey hat yt imi'u i rakat yt

hesokpe i rakat hawyi yt kat i watum tope ma'ato wahanoi Tupana pe yn — Pyno waku mehī mana ahētup aru Tupana pe eipowyro hamuat wato'e yt kat i watum pytkai — Tupana aru epoi mehī mana wato'e yt kat i mi'u watum pytkai. ¹⁶ Ma'ato yt kat i watum mote yt karāpe i ta'atumohey ahehay — Uruto ti Iesui mohey kahato haria ai'e hap. Tupana eipainug wato'e yt kat i sokpe ium wywo i'atupowyro hamo hawyi yt ta'atumohey i ahehay — Uruimohey kahato Iesui ai'e hap. ¹⁷ Mi'i tā watunug pote yt watomoherep hin i i'atuepe ahepiat Iesui mohey sese hap are. Mi'i pote heso rakaria wo watoīne'en i'atuwanētup hawe i'ewyte Tupana wanētup hawe. Uiwyrīa'in iku'uro rakat nem kahato rakat yt ikahu hin i toīne'en. Yt uwe miky'esat ewy hin i toīne'en aikotā i'okpuk nem nakat ewy watoīne'en aitoria Iesui mohey haria yt hegyi'at i rakaria aito hawyi. ¹⁸ Mi'i hawyi te'ero'e irania'in ahepe — Ma'ato tukupte'en ni Iesui mohey haria yt kat i ta'atuminug wakuap ko'i e haria. Mi'i hawyi eheso kahato are i'atuepe katupono Iesui mohey hap sese kaipyi tuwētem wuat'i waku nug hamuat ko'i are. Yt pote yt kat i Iesui mohey sese hap aikai are i'atuepe. Uito ti atimoherep uhepiat Aika'iwat mohey hap miit'in ky'e hap wywo are. ¹⁹ — Uruto ti uruimohey kahato Tupana i'atu'e uhepe irania'in. Uruimohey sese Tupana wētup yn toīne'en i'atu'e uhepe. Pyno waku mi'i tā watomohey i'atuepe wen ma'ato eiwe'eg wo o katupono i'ewyte ahiag timohey kahato wy wētup yn Tupana toīne'en hap token'ē popuo. Ahiagnia timohey Tupana toīne'en hap wen ma'ato yt Tupana miky'esat ewywuwat nug hin i haria wo

tukupte'en. Ahiagnia ta'atumohey sa'ag pytkai.
²⁰ Yt kan hamo i — Atomohey kahato Tupana wato'e hawyi yt kat i watunug wakuap miit'in me. Mi'i tā watunug pote — Heso kahato rakaria eipe i'atu'e irania'in ahepe te'eruanētup hawe. Ahehay wo yn watoomohey Iesui pote yt aiwe'eg hin i aito. ²¹ Watikuap ta'yn aikotā sa'awy'ite aha'ase'i Aparāu tunug nu kawiat heiam aikope aihū watiwuk Tupana mowepit hamuat hap ewy. Mi'i hap tote toiporokpun tosa'yru Isaki i'auka hamo Tupana piat ipo'oro hap ewy. Mi'i hawyi mi'i tā iminug kapiat teha'at howawi Tupana hawyi — Waku kahato rakat en Aparāu e Tupana tope. Eminug kaipyi mesup atikuap sese ra'yn uimohey hat sese en e Tupana tope. ²² — Waku en Tupana katupono aha'ase'i pot timoherep tepiat Tupana mohey hap tominug wo. Imohey hap toimoherep kahato wuat'i pe tominug wo. To'okupitu kahato imohey hap iminug ko'i. I'e hap tutunug hap kaipyi Tupana tikuap tomohey hap sese aha'ase'i pot Aparāu sa'awy'i. ²³ Aikotā Tupana to'e sa'awy'i hap ewy — Uiwiy kahato ti en Aparāu e. Uimohey hat sese ti en e. Hāpyk kahato rakat en uiwanētup hawe uiwy e Tupana tope. ²⁴ Uiwyrria'in imohey hap toīne'en ahehay pe yn mote Tupana yt aimohāpyk kuap i katupono uiminug wakuap kaipyi yn watimoherep kuap Tupana mohey hap sese toīne'en aipy'a pe. Ma'ato yt kat i imohey hap moherep hap aikai waku nug hap ko'i mi'i pote yt toīne'en i Iesui mohey hap sese aikai ma'ato heso rakaria wo watopyhu'at aito. ²⁵ Sa'awy'i mana Irapi timoherep kahato Tupana mohey tepiat hap katupono toi'atuporereke

to'yat pe typy ok surara Isareu ywania Tupana mipo'oro ko'i sepiok e hanuaria. Mi'iria pe mana Irapī timoherep mu'ap wētup i'atupopy hamuat mig'i wo toimoherep i'atuehakyera'at hap katupono irania'in surara tikat mi'iria i'atu'uka hamo. Mi'i hap ewywuāt mana Irapī tunug hawyi Tupana tikuap ta'yn tomohey hat ra'yn toīne'en hap. Mi'i hawyi toiehakyera'at mekewat haryporia yt iwe'eg i rakat wuat'i ihainia'in wywuāt ieīne'en hat pytkai. ²⁶ Pywo ti rat uhekatuwyrīa yt kat i aipā'āu pote yt kat hamo i aipiit katupono iku'uro ra'yn. Aheha piat toto hawyi — Iku'uro sese ra'yn i'atu'e. Mi'i hap ewy ti yt kat i miit'in powyro hap Iesui mohey hap moherep hap aikai hawyi iku'uro rakat ewy ra'yn watoīne'en yt iwese rakat ewy i yt kat nug hat wo i ra'yn watoīne'en. Yt wati-moherep Iesui piat miit'in ky'e hap irania'in me ahegyi'at hamo pote yt kan hamo i wato'e hatek takaria pe — Uruimohey kahato Iesui wato'e ai'e hap. Pywo ti rat uimienoi are uito Tiaku.

3

¹ Uiwyrīa'in eiwe'eg wo o — Uito po'og torania kawiat wo'omu'e hat ei'e hap wywo katupono miit'in mu'e haria kape yn Tupana po'og iha'at sio ta'atumu'e hap ewy ta'atunug sio yt te'eropyhu'at sio ta'atunug ta'atuepiat miit'in nāpin hap ewy sio yt hap kape teha'at kahato Tupana. Ma'ato yt watunug i ahepiat miit'in nāpin hap mi'i pote po'og ai'apiheg hap topyhu'at aipotmu'eria kai katupono yt watunug i Tupana aināpin hap ko'i pote mi'i pote ti — Typy ihay haria eipe e aru ahepe Tupana mekewat e'at pe karāpe Tupana

timoherep yne miit'in me uwe waku uwe yt naku i hap airo hap e'at pe. Mi'i tupono waku perup'i puo wati'atumu'e miit'in are. Waku wato'e aiwanētup hawe — Yt hāpyk i ahenoi pote ati'aparap kahato Tupana pe waku wato'e aipy'a pe. ² Pyno torania aito i'aparap haria watoīne'en. Ma'ato ahehay wo ahēku wo yt wati'aparap i pote yt karāpe i sa'ag nug hano watoīne'en katupono aipy'a piat aiwanētup hap moherep hap ahehay topyhu'at. Karāpe yt wati'aparap i ahehay wo pote hāpyk pe kahato watoīne'en aheīne'en hap tote. Ahehay hāpyk takat watunug kuap pote watuwepo'oro kuap yne aipiit wakuap nug hamo.

³ Aihū Kawaru wē sakpo watikytyt saity hawyi mi'i ete watimohāpyk aikotā hewyry aimiky'esat ewy hamo. Kurin kat ete pyi watimoewyry aihū iwato sese pytkai. ⁴ I'ewyete ahe'yara iwato kahato rakat pytkai watimohāpyk kahato y'y puo apukuita kurin kat no. Mi'i hawyi aimiky'esat ewy toto ahe'yara iwato kahato pytkai. Imohāpyk hap kurin hetu'a pe toīne'en wen ma'ato totomoesaika kuap yne wasere wato pytkai waku ahewyry. ⁵ Mi'i hap ewy ahēku topyhu'at kurin aipiit kai mekewat saity aihū Kawaru wē sakpuat ewy mekewat imohāpyk hap kurin hetu'a piat ahe'yara etiat hap ewy. Ta'i ahēku ti yt iwato i pytkai — Uito po'og torania kai wato'e ahēku hit no. I'ewyete aikotā aria hit ta'at go iwato rakat rote igag nakat rote hap ewy meremo aria iwato kahato topyhu'at itote. Mi'i hap ewy ahēku hit kaipyi iwato kahato sa'ag tuwenug. ⁶ Ahehay sa'ag ni aiwanētup hap ma'at kuap hat toīne'en. Aima'at hat kahato ti rat ahēku. Wo'oeremopusu hap tuwētem

ahēku pyi aiwo'oma'at'i ma'at'i hamo. Aikotā aria ahekare'en wuk hap ewy ahehay toīne'en. Ahehay aikotā mekewat sa'ag nug hat eiam wyti aria wato yn toīne'en. Ahehay sa'ag ahēku kaipy-wiat miit'in wuk hap ewy topyhu'at. Ahehay wo miit'in ma'at hap topyhu'at katupono aheīne'en hap moko'i moko'i hap aiwanētup hap pyi tuwētem ahēku pyi are. Ta'i aimohun hap wyti ahehay sa'ag. ⁷ Ta'i watikuap kahato haiwot rakaria ga'apy piaria moperup'i aihū wuat hap i'ewyite weitaria aihū wo atimoperup'i kuap i'ewyite topyhu'at hewyry rakaria aihū wo watunug. I'ewyite piraria watimoperup'i kuap aito. ⁸ Ma'ato mi'i pytkai ahēku yt watimoperup i kuap i katupono ahēku miit'in auka kuap hap topyhu'at. Ahehay wo watima'at kuap kahato miit'in. Moi haiwot rakat ewy ahēku toīne'en katupono mi'i wo wati'atu'uka kuap miit'in aimima'at ko'i. ⁹ Ahehay sa'ag ahēku pyi gu'uro hy ewy toīne'en katupono — Waku kahato en wato'e Ai'ywot Aika'iwat Tupana pe wen ma'ato miit'in me — Motoro meiūpepyi aria wato kape wato'e sa'ag ahewanīkaptia pe miit'in me Tupana minug toiā'ākap ko'i pe. Ahēku wo — Waku kahato En Tupana wato'e mi'i hawyi mekewat ahēku wo wati'atukuasa Tupana minug miit'in ko'i. Yt naku i kahato mi'i tā are. ¹⁰ Wētup ahehay pyi tuwētem Tupana mōtypot hap i'ewyite wētup ahehay pyi tuwētem miit'in mohit hap. Yt naku i ti rat mi'i tā are. Are pāi yt aiwe'eg hin i ahēku moperup'i hap ete aito. Aiwemōti hap kahato ahehay. ¹¹ Yrasa pyi yt karāmuo i y'y tuwētem he rakat nop takat wētup ka'a pyi yn. Mi'i hap ewy yt naku i ahehay he rakat ahehay

nop takat ahēku pywiat. ¹² I'ewyte yt karāpe i Paku'a yp kaipyi hewo muse saat ne'i. I'ewyte yt karāpe i hewo Warana yp kaipyi Wasa'i saat ne'i. I'ewyte yrasa ihy nop takat yt tum kuap i aimi'u he rakat. ¹³ Mi'i hap ewy kahato yt naku i ahehay sa'ag yt Tupana Pā'āu miky'esat ewy i ahēku wo. Waku watunug wakuat yt kat i aiwemōtypot hap wywo. Mi'i hap ewy waku aheīne'en hap he rakat ewy aiminug wo'owese hap wywo yt kat i — Uito po'og ai'e hap aiwanētup hawe. Waku yne ahehay wakuap wo watimoherep aiwe'eg hap imōtypot hamuat. ¹⁴ Karāpeī wato'oeha'ywywi hawyi yt kat i aiwo'owese hap aikai topyhu'at. Mi'i pote yt kan hamo i — Uito ti po'og irania'in kai wato'e ne'i. Ma'ato mi'i tā mote watuwema'at ne'i. ¹⁵ Karāpeī watu'uka aiwo'ope Tupana piat aimu'e hap kaipyi mi'i pote yt we'eg hin haria wo i watopyhu'at. Karāpe wato'oeha'ywywi aiwo'ope watopyhu'at irania'in yt imohey i haria ewy ne'i. Aikotā ahiag potmu'eria ewy watoīne'en. Aikotā ta'atumiky'esat yn nug haria ewy watopyhu'at. Yt naku i kahato watu'uka aiwo'ope Tupana piat aimu'e hap kaipyi. Mi'i tā watunug mote yt karāpe i Tupana mimu'eria watopyhu'at ma'ato ahiag potmu'eria watoīne'en. ¹⁶ Karāpe wato'oeha'ywywi aiwo'ope — Uito ti po'og eikai ai'e hap aipy'a piat kaipyi mi'i hawyi meiūran wanīkaptia wo watopyhu'at itote hawyi aiwo'oma'at'i ma'at'i hap yt ikahu hin i rakat topyhu'at aiwo'opiat. Yt naku i are.

¹⁷ Ma'ato Ai'ywot atipy piat iwe'eg sakpo toīne'en. Mi'i ti aimu'e kahato aipy'a pe towe'eg hap yt ahiag wat ewywuat hin i. Mio tā e ahepe — Pywuat kahato eweikupte'en no Ui'ewy e ahepe.

Wo'owese haria wo ro eweikupte'en e. Wo'oky'e haria wo wo'opowyro haria wo wo'owesat kahu hanuaria ui'ewy o eweikupte'en o e ahepe. Waku wo'oky'e hap moherep hanuaria wo eweikupte'en e ahepe. Waku wakuat nug haria wo eipe e. Waku yt wētup ok i miit mohit hanuaria wo eweikupte'en no e ahepe. Waku yt typy ehay rakaria wo eweikupte'en e. Waku to'o'ewy'ewy wuat'i miit'in ky'e haria wo eweikupte'en e ahepe aimu'e kahato hat atipy piat Ai'ywot. ¹⁸ Watikoi aikope aimikoi wakuat pote waku kahato hētyt hawyi ma'ato yt pote yt kat i aimi'u wakuat watipuēti aru hat hawyi. Mi'i hap ewy kahato wo'oky'e hap watikoi hawyi aiwo'owese hap toīne'en aru aiwo'ope hawyi aimowepit hap toīne'en aiwo'ope. Mi'i hawyi hewo kahato aru waku hap ahete aimi'u he kahato hap ewy aimikoi he hap ewy. Uito eimu'e hat pot Tiaku are.

4

¹ Koitywy ahenoi teran ehepe kat kaipyi kat kaipyi aiwu'uka hamuat aiwo'oehay poepyk hamuat hap tuwemoherep hap ko'i. Pyno ahenoi ehepe — Uiat uipo pe atiky'esat ewat ekat ai'e hap sa'ag kaipyi ti watu'uka. — Uimiky'esat yn waku watunug e hap kaipyi watu'uka. Mi'i hap kaipyi yt aiwo'owese i hap toīne'en. ² — Atiky'esat ewat uiano wato'e irania'in me ma'ato — Yt atum i i'atu'e ahepe hawyi — Pyno yt etum i pote yt uiwese i aru wato'e aipy'a pe aiwyria'in me. Mi'i hawyi wato'o'auka teran irania'in ete i'atuekat ky'ewi. Yt naku i mi'i tā are. Po'og waku wahētup hētup Ai'ywot Tupana pe aimiky'esat ko'i are. Yt

kat i aimiky'esat ko'i toĩne'en aipo pe katupono yt wahētup Ahekat nug hat Tupana pe i pote e. ³ Mi'i hawyi aimiky'esat Tupana pe wahētup tuereto wen ma'ato yt tutum i aimiētup katupono yt tomiky'esat ewy i wahētup pote. Aimiky'esat ewy sa'ag ne'i wywo yn wahētup wote aimowepit hamuat kape yn wahētup pote yt tutum kuap i aimiētup.

⁴ Aikotā ahehary'i ete aipohari hap ewy yt ikahu hin i mi'i hap ewy kahato yt ikahu hin i typy ahetupana pote. Yt naku i typy ok miky'esat ewy watunug Tupana miky'esat wakuat i'ewyete mesuwarotiararia miky'esat ewywuat yt naku i nug haria miky'esat ewywuat pote. Yt ikahu hin i mi'i tā watoĩne'en are. Tupana ewanīkaptia miky'esat ewy watunug mote Tupana ewanīkaptia wo watoĩne'en. Uwe uwe mesuwarotiat yt naku i nug haria seko sa'ag wo tuwewy'inug mi'i hat Tupana ewanīkap mo topyhu'at. ⁵ Ewe'eg wo e Tupana sa'awy'iwuat pupi — Uiwano yn woroky'esat e ahepe. Ma'ato wētup tupana eweimohey hawyi uheha'ywywi kahato tupanaria ete e Tupana Pā'āu ahepe. ⁶ — Ati'atumoesaika kahato waure wuat gupte'en haria pe. Mi'iria pe atum ne'en kahato wakuap mi'iria pe ma'ato irania'in me — Uito po'og e haria ewanīkap wo areĩne'en e Tupana ahepe. Uhegyi'at hap po'og atum paa'e haria pe e Tupana ahepe. ⁷ Tupana tiky'esat ai'e hap — Tupana atiky'esat emiit sese wo waku wato'e aiperup'i popuo e. Ui'ywot uimoesaika kahato uiminug sa'ag ko'i akit hamo waku wato'e. Tupana eti'akit o ahiag ui'okpe totiat wato'e waku. Uimoesaika Epā'āu wo ahiag sopo hamo ehay wo

— Motoro ui'yatypepyi ahiag me e hamo waku wahētup Tupana pe. Mi'i hawyi waku wato'e — Tupana etisopo ro ahiag uhā'āg hat mesuwe waku wato'e. Mi'i hawyi ahiag topopy ra'yn meremo ai'yatypepyi Tupana pupi.

⁸ Pyno karāpe watiky'esat watukupte'en Tupana wywo mi'i pote waku watuwat Tupana kape aimiky'esat ētup hamo. Aiwanētup hap kaipyi aipy'a pyi ahehay hawyi tut ahowawi aimiky'esat ewy. Mi'i hawyi aikotā watuwei aipitpit potiat hap ewy ra'yn y'y pe waku mi'i hap ewy waku wato'e Tupana pe — Ui'ywot uikoho Esa'yru suu wo uimi'aparap sa'ag ko'i waku wato'e. Uipo ti iminug yt naku i hap ko'i pote uipo ipitpit hap ewy. Mi'i pote etikoho uipo yt naku i nug hap hep hamo waku wato'e. Ui'ywot atipy piat pe uiwanētup hap uipy'a piat typy sehay potiat uipiit yt naku i topyhu'at. Mi'i pote etikoho kahato uhepiat i'aparap hap ko'i yne waku wato'e Tupana pe. ⁹ Waku paawato'e Tupana pe aiminug sa'ag upi aikotā haty kahato hap aipy'a pe hap ewy aikotā aiwy sese iku'uro hawyi haty hap ewy waku aiwak hap aipy'a pe hawyi — Tupana sakpo'e atunug sa'ag wato'e. Yt ikahu hin i atunug eete. Mi'i tupono uimōti te kahato rat uipy'a pe waku wato'e aiwak popuo. Tupana uhepiat ema'at hap ko'i yt ikahu hin i uipy'a pe uiwanētup hawe. Ahaty'u kahato yt kat i hin i uiwepit hap toīne'en. Uimōti hap yn toīne'en uikai waku wato'e yt kat i aimikyry'i hap wywo. ¹⁰ — Ehamo Tupana aremōti kahato uipy'a pe paa'e hap wywo wato'e. Pywo pe pote Tupana mimōtypot sese ko'i watopyhu'at wuat'i e'at pe wuat'i ehamo.

11 Uiwyrĭa'in yt naku i ahehay sa'ag wētup ok ete irania'in ete katupono Tupana to'e miwan me — Eiwo'oky'e ro eiwo'ope e. Mi'i pytkai wati-mohit ne'i wētup ok irania'in ehamo pote — Yt naku i meiēwat miit wato'e pote Tupana wo'o-nāpin hap pun hanuaria wo watoīne'en katupono yt i'e hap ewy hin i watunug mote. Uiwyrĭa'in yt naku i watimohit wētup ok ahehay yt naku i rakano. — Eti'atumōtypot ro irania'in e Tupana sa'awy'i miwan me. Karāpe wati'atusaty'i saty'i miit'in ahehay wo hawyi wati'aparap kahato Tupana piat aināpin hap yt watimōtypot i aiwy pote. Mi'i hawyi watimohit Tupana piat aināpin ko'i katupono ai'e hap aiwenāpin hap sa'ag yn watunug. Po'og waku watunug aināpin hap sese Tupana iwe'eg sese rakat piat aināpin hap. Yt naku i ewei'atumohit wētup ok miit e Tupana pote. 12 Tupana yn aikuap sese sio waku aito sio yt hap katupono Tupana yn ni ikuap aiwanētup hap wakuap ko'i sio yt nakuap i ko'i. Mi'i tupono kat poteī pyno — Yt naku i en wato'e wētup ok miat pe yt watikuap i kahato ipy'a piat pytkai. Tupana yn ikuap wakuat sio yt hap. Mi'i yn ikuap ainug ko'i. Mi'i pote Tupana yn ahehakyera'at kuap i'ewyte Tupana yn ni ai'apiheg kuap. Mi'i pote yt naku i wato'e wētup ok etiat — Yt kan hamo i mekewat miit. Yt naku i kahato mi'i tā wato'e katupono yne miit'in Tupana miky'e ko'i tukupte'en. — Wuat'i miit'in torania ahekat ko'i ewy tukupte'en e Tupana ahepe. Mi'i pote yt eweimohit rei'o uhekat ko'i e Tupana yt miit'in mōtypot i haria pe.

13 Waku aiwe'eg wo kahato ahehay pupi — Uimiky'esat yn atunug neran e hap pupi — Pyno

mūki'ite uimiky'esat ewy uiwepyi areto wētup tawa kape hawyi itote areĩne'en mot'i hawyi itote atunug uiko iwato'in nakat uimiky'esat ok tā hawyi uhekat kahato ra'yn areĩne'en itote ai'e hap pupi waku aiwe'eg wo. — Pywo ti rat ui'e hap ewy atunug aru uimiky'esat ok tā hawyi uiwepyi arepotpap kahato itote hawyi ati'atunug iwato kahato uhekat ko'i hawyi areĩne'en hekat kahato rakano itote uito. Ta'i uimiky'esat ewy yn aru ati'atunug e hap pupi waku aiwe'eg wo uiwyrria'in. ¹⁴ Katupono yt watikuap hin i aikotā mūki'ite aipore'ihot'ok hap pytkai i aikotā aru watoĩne'en sio are. Tupana yn mi'i tā kuap hat i'ewyte yt watikuap hin i karanja e'at re aheĩne'en hamuat hap ko'i. Ta'i aikotā hunete y'y he'yhig am hawyi atposake hawyi yt kat i ra'yn toĩne'en itote. Mi'i hap ewy kahato aheĩne'en hap topyhu'at mesuwarote. Ta'i aheĩne'en porap i hawyi aiku'uro ra'yn meremo hap ewy watoĩne'en mesuwat yi tote uiwyrria'in. ¹⁵ Mi'i pote po'og waku wato'e aipy'a pe — Tupana atunug neran emiky'esat ewy po'og waku wato'e. Tupana etum uhepe ehesaika hap uipowyro hamuat. Mi'i pote ti aru areto motpap nug hamo po'og waku wato'e aipy'a pe. ¹⁶ Yt naku i kahato watuwemowato kahato ahehay wo — Atunug kuap yne ai'e hap ete uiwyrria'in. Yt naku i wato'e — Uito po'og yne miit'in kai ai'e hap ete. Yt naku i aito watopyhu'at aiwehay pyi. Yt naku i — Uito po'og ekai e hano watopyhu'at.

¹⁷ Uimimu'eria karāpe watikuap kat som waku Tupana tiky'esat watunug hap hawyi ma'ato yt watunug i imiky'esat ewy hawyi wati'aparap kahato Tupana pe yt watunug i imiky'esat pote. Yt

nakuaria i wo watopyhu'at yt kat i hin i watunug pytkai. Mi'i tã hap atiky'esat eweikuap ta'yn uiwyrria'in are uito Tiaku.

5

¹ — Eiwe'eg wo o hekat rakaria. Eiwe'eg wo o wo'opo'oro i po'oro i te'en ne'i haria pupi e Tupana. Koitywy yt pya hin i eiwo'okak'i hamuat hap e'at e Tupana. Yt pya hin i kynkyn'ei'e hap e'at ehapiat ho'opot hap wuat'i e'at piat hamuat e katu-pono eiwemoekat kahato miit'in ma'at hap kaipyi e Tupana. ² Mekewat e'at pe ti aru eimisoknug ni hokpyp ne'i ra'yn topyhu'at e Tupana. Ehesokpe sok ko'i nupi'a yat no ra'yn topyhu'at yne yne aru e Tupana. ³ Ehekat ikahuria rakat ahyt aru yt kan hamo i ra'yn topyhu'at i'ytyk tutu'u yne ra'yn hawyi e. Mekewat e'at ehakat ikahu miit'in mipugha wo ra'yn topyhu'at nem ne'i pote e. Sa'awy'i imehit rakat yn ehakat ma'ato mekewat e'at pe i'ytyk kahato rakano ra'yn topyhu'at ikamhig sa'ag nakano ra'yn topyhu'at e. — Kat pote kahu yt eweimõ'ë i ehakat ko'i nimo te uruepe i'atu'e ti aru ehepe ewyria'in hatek takaria. Kat pote yt ehogyi'at hin i uruepe nimo i'atu'e aru ehepe ihaky'e'i rakaria. — Mi'i hawyi ehakat ko'i i'ytyk kaipyi ti aru ta'atukuap meremo ra'yn yt ehogyi'at hin i kahato hap e Tupana — Uiwano yn neran e haria pe. — Ehakat ahyt topyhu'at aru aria wato mi'u wo e Tupana. Mi'i hawyi eipe ekat wuk hap pe eweikupte'en at ka'ap ei'apiheg hamuat wuat'i e'at pe e Tupana aru hatek takaria pohari haria pe. ⁴ — Sa'awy'i eimikoi eropat haria i'atupotpap kahato eiko nug hamuat pytkai ma'ato yt kat i

ewetum i'atuepe. — Pywo ti rat mūki'ite aru atum eipotpap sa'up ewei'e pytkai yt kat hin i ewetum i'atuepe. Yt ehegyi'at i hap kape ara'akasa yne ra'yn Uito e aru Tupana yt imō'ē i haria pe. I'atuesy'at kahato ehemiit'in e. Yt i'atuesokpe hin i rakaria mi'iria. I'atuehaky'e'i kahato te'e-repotpap at ka'ap pytkai yt kat hin i ewetum e. Sa'awy'i kak'i'atu'e kak'i'atu'e ahediat — Tupana yt urupoi i urupo'oro haria uruka'iwaria hekat rakaria i'atu'e uhepe e. Yt ta'atumō'ē hin i uruepe urupotpap hap sa'up i'atu'e irane to'okak'i popuo uhepe ihaky'e'i rakaria e Tupana. ⁵ Yt ehegyi'at hin i eipe e aru ehepe katupono eiwemowepit hap yn ewetunug eheīne'en hap turan e. Kat ko'i kat ko'i eimiky'esat ok tā ewei'atunug atunug kahato. Ei'yat wakuat pe ienuk hap yn ewetunug. Eimi'u ikahu kahato ma'ato eiweran ewei'atumo'ok kahato. Yt kat i ewetum hesy'at sese rakaria pe e Tupana aru ihaky'e'i rakaria ma'at haria pe. Aikotā sa'awy'i eihūria ewei'atumokyt kahato awati wo i'atu'uka hamuat i'u hamuat hap ewy kahato eiperia tukupte'en ikap kahato rakaria wo e aru Tupana yt hegyi'at rakaria i pe. Ikap kahato rakaria wo koitywy eweikupte'en eihūria ewy e. Eikap ti waku kahato aria mi'u wo pote mesup ta'yn waku pe eweikupte'en kahato ma'ato uimi'apiheg wuanuaria wo e Tupana mi'iria pe yt ta'atupoi hin i ta'atupotpap nug haria hawyi. ⁶ — Sa'ag nug haria ti eipe katupono miit'in wakuat kuasa haria wo eweikupte'en are'e aru ehepe e Tupana. I'atuekat ky'ewi — Ewei'atu'uka mi'iria ewei'e yn esurara'in me wakuap yn ta'atunug pytkai e. Ewei'atu'uka yt kat i sa'agi'atu'e i ehapiat

pytkai e aru Tupana yt hegyi'at i rakaria hekat rakaria pe.

⁷ Uiwyrria'in waku aiperup'i po'og po'og watoĩne'en Iesui ekatup haype miit'in aimoweuka'i pytkai. Aikotã aikopiat aimikoi wahekatup hepamo hap ewy. Sa'awy'i watikoi hawyi i'aman hap wahekatup imoëtyt hamo. Mi'i hawyi wahekatup i i'aman tuereto hap imotag hamo. Perup'i popuo wahekatup haat hap kape imo'apuhup hamuat kape. Mi'i hap ewy waku wahekatup Iesui ut hap. ⁸ — Yt pya hin i ti Iesui ut hap waku wato'e yn aiwo'oŋe aiwemoesaika hamo. Yt naku i watoiat hut hap mohey hap katupono tut aru Aika'iwat. Waku wahekatup hut hap aiwemowepit hap wywo. ⁹ Uiwyrria'in yt naku i wato'oehay petek petek hekatup haype katupono wo'oehay petek petek haria pe ti aru — Yt nakuaria i eipe e aru Tupana. Yt pya hin i aika'iwat ut hamuat uwe waku uwe yt naku i to'e hamo. Yt pya hin i Aika'iwat ut hap aikotã oken'ypy og me hap ewy yn ni toĩne'en meke — Areke teran e hat ewy toĩne'en.

¹⁰ Uiwyrria'in yt naku i ti watiwaure aipy'a pe sa'awy'iwuat Tupana ehay moherep haria piat ho'opot hap ko'i. Ta'i nimo te ti ta'atuho'opot pot'i kahato miit'in mikyry'i ta'atuetiat imohey hap wywuat hap. Ta'i yt i'atuwëpohep hin i ti Tupana e hap moherep hap ete miit'in ti'atusaty'i saty'i pytkai. Mi'i tupono waku watunug mi'iria ewy. ¹¹ Mi'iria sa'awy'i tokoka'at ra'yn ho'opot hap sakpo. Mi'i tupono koitywy Tupana mi'atuewaku ko'i wo tukupte'en eimi'atumõtypot no ra'yn tukupte'en. Watikuap ta'yn ti aikotã nimo

aha'ase'i Io ho'opot pot'i kahato hap ma'ato yt toiwaure hin i Tupana mohey tepiat hap. Imohey mot'i hap po'og iwato ho'opot hap kai. Mi'i pote ho'opot kahato hap sakpo tokosap ase'i Io. Mi'i pote Tupana mipoitynug wo ra'yn topyhu'at. Uiwyrria'in Tupana tikuap kahato ahepiat ho'opot hap. Ta'i Aika'iwat aiky'e kahato tohaty'u kahato ahepiat ho'opot hap.

¹² Ahehay pywo piat hap yn Tupana tiky'esat. Karāpe irania'in me — Atunug aru wato'e pote waku watunug ai'e hap ewy hap. Yt naku i aheso — Atunug aru ai'e hap ete. Ma'ato aheso hap ne'i pote Tupana ai'apiheg e. I'ewyte ti yt naku i Tupana set watipehik — Atunug aru e hap ete. Yt naku i wato'e — Yt atunug i aru ui'e hap ewy pote waku Tupana ui'auka wato'e. Po'og waku — Atunug aru mehī mana wato'e hawyi waku watunug ai'e hap ok tā po'og waku are. I'ewyte yt naku i miit'in set watipehik pywo ai'e hap moheg hamo. Ma'ato Tupana tiky'esat pywo piat yn ahehay hap — Atunug aru ai'e hap ete.

¹³ Ahatek pote watemoehamana'i hawyi waku wahētup Tupana kape aikawiano hamuat hap. Ma'ato toīne'en ahehāite hap aiwepit hap yn ahete pote waku watuwehum Tupana ete aiwepy hap wywo.

¹⁴ Wētup ok i'ahu aipy'asetpiat pote waku mekewat i'ahu rakat ti'atukaykay tuwewawi Iesui mohey haria apykok haria ko'i ta'atuhētup Tupana kapiat hamo i'ahu kosap hamuat hap. Mi'i hawyi ikap takat mohag wo waku ta'atupag i'ahu rakat ete. Mi'i hawyi waku ta'atuhētup — Tupana etimoehāite kahato mesuwat i'ahu rakat esaika

hap mywo Esa'yru Iesui mōtypot hamo waku i'atu'e itote i'ahu rakat moehāite hamuat. ¹⁵ Mi'i tā ta'atunug Iesui mohey hap mywo pote ti aru ipoĩ'ām na'yn te'yni pyi ihāite ra'yn topyhu'at i'ahu rakat. I'ewyte iminug sa'ag kaipywiat i'ahu pote Tupana timoweityk ta'yn iminug yt naku i sa'ag hap ko'i. ¹⁶ Mi'i pote waku wahenoi aiwo'ope aiminug sa'ag ko'i i'ewyte waku wahētup kahato Tupana kape aiwyrria'in kawiano hamuat. Wahētup aipy'a pyi pote aiwo'opoityro kahato hap ewy topyhu'at ahete aiwo'oky'e hap ewy aiwo'ope. Mi'i hawyi toĩne'en kahato aimoehāite kahato hap Tupana kaipywiat hap. Aipy'a hāpyk kahato Tupana wywo hawyi meremo tutum aimiētup niatpo kahato rakat pytkai. Meremo tutum waku miētup ko'i. ¹⁷ Sa'awy'i mekewat Tupana ehay moherep hat Eria ai'ewywuwat miit kahato ma'ato tohētup kahato tepiat imohey kahato hap mywo yn — Tupana etipyhyp to i'aman mye'ym anu 6 ewaty hap atiky'esat e. Mi'i hawyi hētup ewy Tupana tunug itote. ¹⁸ Mi'i hawyi tohētup i ra'yn — Etum i ro i'aman e hawyi i'aman kahato i ra'yn hap Tupana tunug i'e hap ewy. Mi'i hawyi itote ihāite kahato i ra'yn i'atumikoi ko'i.

¹⁹ Uiwyrria'in toĩ wētup ok wētup ok tuereto aipy'asetpiaria wemig Tupana po piat haria ta'atuminug sa'ag ky'ewiat haria. Waku mi'iria watekyi ahehay wo te'era'aipok Tupana ewawiat hamo. ²⁰ Uwe uwe yt nakuat i nug hat porerokosap Tupana kapiat iminug sa'ag myi mi'i hat tihep wētup ok miit wo'o'apiheg hap kaipyi iminug sa'ag ahyt po pyi toiporenōtem Tupana piat iehakye-ra'at hamo. Uiwyrria'in yt eweiwaure ro mi'i tā nug

hamo yt waure wo tei'o.

Uito Tiaku ti mekewat Iesui ywyt sese.
Uheyke'et sese Iesui uruty Maria pote. Koitywy
toran na'yn uimiwan.

Tupana Ehay Satere Mawe Pusupuo
New Testament in Sateré-Mawé (BR:mav:Sateré-Mawé)

copyright © 2011 Wycliffe Bible Translators, Inc.

Language: Sateré-Mawé

Translation by: Wycliffe Bible Translators, Inc.

Sateré-Mawé [mav], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sateré-Mawé

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

86691f85-c501-5f1f-949e-903f2bbf9ae7